

BALUBAMBUKU YA NZAMBI

YINA ME MEKAMA NA NTANGU

 Mpe kaka kusala yawu kuvukana, na nzila ya Biblia, mutindu beto... nge me baka Buku ya Apocalypse, mpe Buku ya Exode mpe Genèse. Mpe ntangu yayi mu me vutuka na yinzo samu na kuzomba bampadi. Ya kele kieleka. Ya kele kaka nyonso yina kele na yawu, kaka samu na kuvwanda ya kusungama. Mpe, Mpangi Roy, wapi ntangu nge ke kwenda? [Mpangi Roy me tuba, “Mbasi.”—Mu.] Mbasi. Mbote mingi. Na yawu beto zola kaka kuvutuka na yinzo na ntangu yayi ya mvula, na yawu, ya kele, beto zola kupema.

² Mu me zimbisa bakilo yivwa katuka ntangu mu monaka beno. Mu mataka na kitezolo, ntangu mu katukaka na lukutakanu yayi, mu me kuma bakilo makumi sambanu na tanu; mpe na kuvutuka ya munu, ya kumaka makumi sambanu na tanu. Na yina, mu ke kuwa mutindu bilele ya munu ke kubwa. Na yina, mu me zimbisa bakilo mingi.

³ Mpe mama mosi, bubu yayi, na kubasika mpangi ya kento ya luzolo, yandi tubaka, “Mpangi Branham, sambila ti mu lenda zimbisa yawu, mpe.”

⁴ Mpe yandi, mwa fyoti na lweka ya nene, na yawu mu tubaka na yandi, “Kwiza kaka, kwenda, longa kaka na ngolo.” Na yina, ya kele nyonso na kutala yina mu zaba, ya kieleka ya ke kulumusa yawu. Kasi, ntama mingi ve beto ke manisa na bampasi mpe bakumekama.

⁵ Mu vwandaka banza na yina me tala kukuma kiboba. Beno zaba, bamvula zole dyaka, mu ke vwanda na makumi tanu. Fiou! Mu ke bambuka moyo ntangu Frankie Weber pesaka munkayulu. Yandi kele kaka pene ya bamvula zole kuluntu kulutila munu. Yandi pesaka mosi ya yiya samu na dikabu ya kilumbu ya yandi ya mbutukulu, awa. Mpe mu kangaka disu ya munu, mpe mu banzaka, “Oh, la la, Frankie Weber, bamvula makumi zole na tanu, mosi ya yiya ya bamvula nkama!” Ya kele ndambu ntangu yayi. Ya ke baka kaka ntangu mingi ve, mutindu yina ve? Ya ke landila kaka na kukwenda na ntuala.

⁶ Beto ke bikana ntangu ya yinda ve. Kaka na suka yayi, ntangu mpangi ya beto ya luzolo vwandaka nata nsangu na kutala ya mfunu mingi, mu ke ndima ti beto nyonso me yangalala na yawu. Mpe mu banzaka kima mosi na ntangu yina yandi vwandaka longa, na manima kuna, mpe mu banzaka, “Ya lendaka vwanda ti Mfumu lendaka pesa munu Disonukwa samu na yawu.” Mu kuzwaka yandi kutanga ndambu na nkokila yayi

na Ndinga ya Nzambi ya kusakumuka. Mpe ntangu yayi mu . . . kaka baminuti fyoti samu na kuzonza, mpe na manima beto ke sambila samu na bambevo, mutindu na mumesanu.

⁷ Mpe Kilumbu ya tatu na nkokila, Kilumbu ya tatu yayi yina ke kwisa na nkokila, kana Mfumu pesa muswa, mu ke zola kubanda na Buku ya Hebreux, kana ya kele mbote. Mpe Buku ya Hebreux, samu na leso. Mpe kuna, mu banza, Lumingu na suka to na Lumingu na nkokila, tatamana na zulu ya yawu. Mpe kulandila Kilumbu ya tatu na nkokila, mu banza kubaka yawu dyaka, kaka na kutatamana na kufutika yawu, na kati ya Masonuku.

⁸ Mpe ya kele na mwa bima yina mu me tala na dibuundu, kaka mutindu mu ke na kukwenda, ti mu banza ba fwana longa mwa fyoti na zulu ya yawu, beno zaba, bima yina ke monana ke lembisa fyoti. Mpe mu banza ti beto lendaka baka yawu kuna na Hébreux. Ya kele—ya kele kapu mosi ya mbote, kisika ya mbote mingi na kutanga. Ntangu yayi, Mpangi Neville . . . Mu zolaka . . . Yina me kwisa na dibanza ya munu, na kukwisaka.

⁹ Mpe mu kele kaka na Ngwisani ya Malu-malu awa, mpe mu ke na kutanga na Biblia ya Collins, bisono kele nene mingi. Mu ke . . . Na manima mu me kuzwa bamvula pene ya makumi tanu, mu fwana pusa yawu ntama mingi na munu, samu na kutanga mukanda yina ya mbote; ya kele nsemo ya yimbi, na mutindu nyonso. Mpe mu ke basika na mwini mpe dyaka ke tanga yawu. Kasi ntangu nsemo ke kumaka mwa yimbi mingi, mu fwana pusa yawu ntama. Mpe dokotolo tubaka na munu ti ntama mingi ve mu ke kuzwa mwa maneti ya kutanga.

Mpe mu yufulaka yandi, “Meso ya munu vwandaka yimbi?”

¹⁰ Mpe yandi mekaka yawu. Yandi tubaka, “Ve. Kumi-kumi, yina kele nene mbote mingi. Makumi zole-makumi zole kele ya kulunga, mpe—mpe kumi na tanu-kumi na tanu kele ya kulutula mbote.” Mpe kumi-kumi, kele, ya kele nyonso yina yandi lendaka tanga yawu. Na yawu mu lendaka tanga kisika nyonso yandi zolaka, na ntama. Yandi tulaka kima mosi, mpe mu bandaka na kutanga yawu. Ntangu yandi kumaka pene-pene, mu bandaka na kukuma malembe mpe malembe. Mu kangamaka ntangu ya kumaka kaka mutindu *yayi*. Yandi tubaka, “Oh, yinga, nge me luta makumi yiya.”

Mpe mu tubaka, “Yinga.”

¹¹ Yandi tubaka, “Mbote, na kutala, babule ya disu ya nge ke fiotuka.” Yandi tubaka, “Ntangu yayi, kana nge zinga luzingu ya mbote, ya yinda, nge ke kuzwa kumona ya nge ya zole, mu banza. Ya kele ntangu nge lenda tanga dyaka.”

¹² Kasi, beno zaba, mu vwandaka banza kaka, yina kele ntama mingi ve, na yawu. Kaka mwa ntangu fyoti. Mpangi Tony, ya kele yimbi, mutindu yina ve? [Mpangi Tony me tuba, “Ve.”—Mu.] Ve, ya kele ve. Ya kele kima ya kusakumuka. Mu ke na kukumaka

kiboba, na lweka mosi, mpe ntwenya na lweka yankaka, samu ti mu ke na kwenda na ya ntwenya yina, yina ke kufwaka ve, nzutu ya kusakumuka, kisika, mpangi-bakala, ya ke vwanda na kima mosi ve ke tambula mbote ve Kuna. Mpe mu ke zinga kaka samu na ntangu yina. Ya ke vwanda mbote mingi.

¹³ Ntangu yayi, ntete mu tanga masonuku ya nsuka ya kukanga, kaka mpova mosi na Yandi na yina beto ke kulumusa bayintu ya beto.

¹⁴ Beto ke kwikila, Nzambi ya Ngolo nyonso, ti Nge zola bana ya Nge kuvwanda na kyese. Ya me salamaka ve samu na beto na kuzinga na mbunzu ya kukanga mpe na mawa, samu ya kele ya kusonama, ti, “Ntima ya kyese ke salaka mbote mutindu nkisi.” Mpe beto ke zolaka kusepela na balusakumunu ya Nge mpe kuzwa kubundana yayi ya nene kintwadi. Mpe mutindu beto. . .

¹⁵ Mutindu bakwikidi na kati ya Ndinga ya Nge, beto ke bundana pene-pene ya Ndinga. Ya kele samu na yina beto ke kwizaka awa, ya kele ve kaka samu na kuwa Nsangu, kasi samu na kusambila mpe kubundana na Nge, na nzila ya kutanga mpe kulonga ya Ndinga. Ntangu yayi, Mfumu, Nge ke nyongisa beto ve. Mu ke kwikila ti Nge ke sakumuna beto na bangunga yayi.

¹⁶ Sakumuna pasteur ya beto ya lukumu mpe ya mbote, Mfumu. Beto ke sambila ti Nge ke vwanda na yandi. Mpe mutindu mu talaka yandi bubu yayi, na kulonga ya yandi, mpe kumona yandi mutindu yandi sekaka fyoti na ntangu yina yandi yimbaka nkunga yina, “Ntama mingi ve mu ke manisa na bampasi mpe bakumekama.” Mpe bampangi ya bakento yina, mpe mutindu bawu vwandaka yimba yawu pene na balukutakanu ya batente mpe ya ba-camp. Mpe ya ke salama, mosi ya bilumbu yayi, mpe na manima kukwenda na Kupema yina ya nkembo.

¹⁷ Ntangu yayi, Tata, sakumuna beto mutindu beto ke tanga Ndinga ya Nge, mpe me tanga Yawu, mpe sala mupepe ya madidi na mabanza ya beto mpe bantima ya beto. Mpe zonza na beto, na nkokila yayi. Mpe ntangu lukutakanu ke manisa, mpe beto ke kuvutuka na bayinzo ya beto, ti beto tuba, “Bantima ya beto vwandaka kuya tiya ve na kati ya beto na ntangu yina Yandi vwandaka tuba na beto na nzila?” Samu beto me lomba yawu na Nkumbu ya Yesu. Amen.

¹⁸ Ntangu yayi na mutindu ya nsangu ya kumwangisa nsangu ya mbote ya kieleka ya mutindu beto me kuzwa na suka yayi, mpe mu vwandaka banza, ti, beno zaba, Mpangi Neville vwandaka zonzila na mutindu ya kulutisa kupesa bana madya. Yina na kutala, lenda salama. Kasi ntangu yayi, na nkokila yayi, beto ke sala kaka mwa kuzonza samu na dibuundu. Yayi kele kaka kuzonza samu na dibuundu. Mpe mu zola kutanga. . . kitini yankaka ya Masonuku, na Ngwisani ya Malu-malu, na Matthieu kapu 24, mpe nzila ya 35, Yesu ke na kuzonzaka.

Mazulu na ntoto ke luta, kasi bandinga ya munu ke luta ve.

¹⁹ Dilongi ya munu na nkokila yayi kele balubambuku: *Balubambuku Ya Nzambi Yina Me Mekama Na Ntangu.*

²⁰ Mpe mu kele na mwa bansangu. Mu banza ti mu salaka yawu, samu na...mpe bayankaka awa ti...na yina me tala lukutakanu na kubanda na ba-Hebreux, kapu ya 1te, na Kilumbu ya tatu na nkokila, kana Mfumu zola. Dyambu samu na yina mu fwana zonga yawu, ti, mutindu, na balukutakanu ya munu, mu lenda vwanda na kisika mosi, mpe Yandi ke bokila munu na kisika yankaka. Mu fwana kwenda kaka na yina Yandi ke bokila, beno zaba.

²¹ Ya kele samu na yina mu lenda vwanda ve mutindu Mpangi Oral Roberts mpe mutindu bantu yango bayina ke kubikaka balukutakanu ya bawu bamvula zole to tatu na ntuala, mpe, “Beto ke vwanda kuna,” mpe bantu yango ya nene ya lukwikilu ya nene. Bawu—bawu—bawu me kuzwa nsangu ya bawu.

²² Kasi Nsangu ya munu kele kaka kisika nyonso Nzambi ke fidisa, kana ya kele awa, kuna, kisika nyonso yina ya kele. Mu fwana kwenda kaka ntangu Yandi ke fidisa. Mpe ya kele na ba-ministere zole ya luswaswanu; kaka, Nzambi mosi, Nzambi mosi kaka.

²³ Mu vwandaka banza, mazono, na nzonzolo ya munu na mfinangani ya mwana ya bakala. Mpe yandi tubaka, “Nge zaba, mwa pasteur mosi,” yandi tubaka, “yandi kele muntu mosi ya mbote.” Yandi tubaka, “Kento ya munu mpe munu vwandaka ya kuvwanda na bapyjama ya beto,” mpe yandi tubaka, “pene ya ngunga kumi na mosi na nkokila, mpe yandi kwizaka mpe konkotaka na kielo. Yandi tubaka, ‘Mu me kwiza kaka samu na kuzwa mbungu ya kafe na beno.’” Beno me mona? Mpe yandi tubaka, “Yandi sabukaka bala-bala, na mfinangani yankaka, mpe bawu vwandaka belama na kukwenda na mbeto, mpe yandi kudyaka mwa gato kuna. Mpe kaka...” Mpe na manima yandi tubaka, “Yandi kele—yandi vwandaka na mwa lukolo ya Biblia samu na bana ya fyoti, mpe yandi vwandaka na bana mingi ya fyoti kuna, yandi na kento ya yandi, tii kuna ba zolaka tula batenta na ngaanda, samu na kuyamba bana.”

²⁴ Mpe mu vutukaka, mu bandaka na kubanza, “Nge zaba, ya kele kieleka. Ti, ya kele—ya kele mwa muntu mosi ya mbote.” Mpe mu ke kwikila, Mpangi Fleeman awa, mu ke kwikila ti mwana ya yandi ya bakala ke kwendaka na dibuundu ya Faith Lutheran Church awa, mwa bakala mosi ya kitoko mpe kento ya yandi, ba ke na kusala kisalu ya nene samu na Mfumu. Mpe mu banzaka...Mu kotaka na kusukula ditoma ya munu, mpe mu—mu lembaka nzutu. Mu banzaka, “Samu na yinki mu lenda sala yawu ve, beno me mona, kukwenda bisika nyonso, kubaka bana nyonso, kulanda munu pene-pene? Mu zola bana ya fyoti.

Mpe samu na yinki mu lenda dumuka ve yinzo mosi na yinzo yankaka, na dikunzi na kisika, mutindu yina?"

²⁵ Mpe Kima mosi tubaka kaka na munu, "Ba bokilaka nge ve samu na yawu. Yandi ke na kusalaka kaka yina Nzambi tubaka na yandi."

²⁶ Kasi beto fwana vwanda na muntu mosi awa, mutindu Oral Roberts mpe bayankaka, Josué na mbele, na Nsangu ya lukwikilu mpe luvukulu. Mpe, beno me mona, beto fwana kuzwa bayina lenda vwanda. . . mutindu yina, mpe mosi lenda kuzwa *yayi*, kasi kaka nyonso ke tambula kintwadi samu na kusala kima mosi ya nene. Ya kele Dibuundu ya Nzambi.

²⁷ Mu vwandaka solula na mwa ntangu fyoti me luta na mama mosi ya ntwenya, ya kulemba mpe ya ntima ya kulwala. Mpe mu vwandaka meka na kutuba na yandi mutindu ti—ti kento mosi mpe bakala mosi kele ya kukabuka ve, bawu kele muntu mosi. Muntu salaka. . . Nzambi salaka bakala, nyonso zole bubakala mpe bukento; yandi vwandaka bakala. Ya kele kieleka. Mpe Yandi kabulaka bawu na nsuni mpe salaka bawu ya kuswasana, kasi vukisaka bawu kintwadi mpe ke kulisa bana ya bawu, na kuvwandaka mosi. Mpe na yawu bakala, kele ngolo mpe kikesa, mpe kento kele kitini ya zola ya bakala. Na yawu, bawu kele kintwadi. Ya kele. . . Nzambi kabulaka bawu. Kasi bawu zole vwandaka kaka muntu mosi, b-a-k-a-l-a. Mpe ba ke bokilaka kento ke-nto, ya kele kieleka, mpamba ve ti ba katulaka yandi na bakala. Yandi kele kitini ya bakala. Kasi na—na luzingu awa, na nsuni, bawu vwandaka ya kukabuka. Na kimpeve, bawu kele mosi.

²⁸ Mpe vwandaka zonzila na babakala ke na kuzimbisa baluzolo ya bawu samu na kento ya bawu, mpe ke zola bawu ve mutindu bawu salaka ntangu bawu vwandaka cherie. Nsoni na beno. Beno fwana kusala yawu. Yandi kele ntangu nyonso cherie ya beno. Kieleka. Ya kele kitini yina yandi zolaka vwanda. Mpe beno fwana sala yandi mutindu yina. Oh, beno bika ata mbala ve ti nzyetolo ya makwela yina kusuka, mpamba ve ti ti ya ke suka ve, na Mazulu. Beno ke vwanda kaka ya kulunga mosi, Kuna. Ya kele kieleka. Na yawu nyonso. . .

²⁹ Mbote, ya ke talana mutindu ti bakento zolaka tuba "amen" na yawu. Beno bika ata mbala mosi ve—ata mbala mosi ve ti mu kuwa, "Nge ntangu nyonso ke bokaka na bakento, mpe ke zonzaka mutindu yina." Mpangi ya kento Hickerson, samu na yinki nge me tuba kima mosi ve, to muntu mosi kuna na manima, kutuba. . . ? Nge me sala yawu? [Mpangi ya kento Cox me tuba, "Amen."—Mu.] Matondo na nge, Mpangi ya kento Cox. Ya kele kieleka mbote. Mpangi Cox, yina kele samu na nge, kisika nyonso nge kele ntangu yayi. Mbote mingi. Yinga, tata.

³⁰ Mpe beto zolaka ata mbala mosi ve kuzimbana na kuzitisa mosi na yankaka. Ntangu nyonso kuvwanda ba-cheri. Kubika

yawu ata mbala mosi ve kusuka.

³¹ Mwana mosi ya bakala ya Katolika kwizaka na munu, ntama mingi ve. Kento ya yandi vwandaka kabuka na yandi. Yandi tubaka, "Billy, mu ke zolaka ve kukwiza na nge; mu kele muntu ya Katolika, mpe nge Protestant." Yandi tubaka, "Nganga-Nzambi basisaka munu na yinzo ya munu, ntama mingi ve."

Mpe mu tubaka, "Yinki kele dyambu, Ham?"

³² Yandi tubaka, "Mbote, yandi tubaka na munu." Yandi tubaka, "Mu ke kunwaka mwa malafu," mpe yandi tubaka, "na nkokila, mu ke salaka mingi." Yandi tubaka, "Kento ya munu ke banzaka ti mu fwana kwisa konso nkokila mpe kupesa yandi bezé, mpe kubumba yandi na nzutu, mpe kusala kaka mutindu ntangu beto vwandaka kubama na kukwelana." Yandi tubaka, "Beto kwelanaka mpe kele na nkonga ya bana." Mpe yandi tubaka, "Beto, ya kele ntangu. . ."

³³ Mu tubaka, "He, vingila fyoti, mwana-bakala. Nge ke na foti. Nge ke na foti. Ya kele kaka mutindu mosi ntangu ya vwandaka ntete beno kwelana. Beno me mona? Nge fwana bambuka moyo na yawu ntangu nyonso." Mu tubaka, "Yandi me kuma na bamvula makumi yiya ntangu yayi, na ntangu yina yandi ke na nsatu ya kieleka ya bukebi ya nge."

³⁴ Na yawu, ba vwandaka na yinzo ya lufundusu ya kufwa makwela. Mpe yandi tubaka, "Mu zaba ve yina mu ke sala."

³⁵ Mu tubaka, "Kwenda, bokila yandi. Kana mu kwenda kuna, mutindu Protestant, yandi ke yamba munu ve. Kasi mu. . . Nge me mona?"

Yandi tubaka, "Oh, yandi ke zolaka nge."

³⁶ Mpe mu tubaka, "Na yina, kwenda bokila yandi kaka, tuba na yandi ti nge me soba mabanza ya nge."

³⁷ Mpe na yawu kilumbu yina landaka, mu bokilaka zuzi mpe tubaka na yandi. Mpe mu tubaka na mwana ya bakala yayi, mu tubaka, "Mu ke vwanda kaka ya kuvwanda kuna na yisi kisika zuzi ke vwanda na kusemba nge. Mu ke sambila samu na beno. Kutuba ve na kento samu na yina me tala yawu."

"Mbote mingi."

³⁸ Na yawu, mu vwandaka na yisi kuna, vwandaka sambila. Na manima ya mwa ntangu fyoti mu kuwaka mwa makelele na yisi ya kimatinu, mpe awa bawu ke kwiza, na maboko ya bawu pene-pene ya mosi na yankaka, kaka na mwa bakuseka nyonso, beno zaba. Yandi tubaka. . . Mu tubaka, "Oh, mbote, kuna!"

³⁹ Mpe yandi tubaka, "Mpangi Branham, ya me kuma mwa ntangu kubanda mu me mona nge!" Yinga, baminuti makumi tatu, beno me mona. "Mwa ntangu kubanda mu me mona nge!"

40 Mpe kento tubaka, “Kasi, Révérend Branham, mu me mona nge ve ya me kuma ntangu ya yinda! Kyese na kumona nge dyaka!”

41 Mu tubaka, “Matondo na nge. Kasi,” mu tubaka, “beno ke monana mutindu ti beno kele bantu yina zolana.”

“Oh,” yandi tubaka, “beto kele kaka mbote. Mutindu yina ve, cherie?”

Kento tubaka, “Yinga, beto kele mbote, ya luzolo.” Mpe mu...Kento tubaka, “Kwiza mona beto kilumbu mosi, Révérend.”

42 Mpe mu tubaka, “Matondo na nge, mingi.” Mu tubaka, “Bayi, na beno!” Bawu lutaka, mpe bakala yina balukaka mpe ningisaka diboko, mutindu *yayi*. Yawu nyonso salamaka. Ya kele kieleka.

43 Zola ke nungaka nyonso. Ya kele kieleka, kaka—kaka zola. Beno lenda vwanda na bidimbu ya beno nyonso mpe bimbangi ya beno, kasi beno pesa munu kaka zola. Yina—yina ke sukisa dyambu, samu na munu. Oh, la la!

Mwana-dimeme ya luzolo yina kufwaka,
Menga ya Nge ya ntalu
Ke zimbisa ngolo ya yawu ata fyoti ve,
Tii kuna Dibuundu nyonso ya Nzambi yina ba
vulusaka
Ke kuzwa mpulusu, na disumu dyaka ve. (Beno
me mona?)

Kubanda ntangu yina na lukwikilu mu
monaka maza yina
Ke basika na bamputa ya Nge,
Zola ya mpulusu me vwanda dilongi ya munu,
Mpe ke vwanda tii mu ke kufwa.

Ya kele kieleka. Oh, mbote mingi!

44 Ntangu yayi, balubambuku yina me mekama na ntangu! Kisika mu me kuzwa dibanza yayi na suka yayi, vwandaka na nsangu ya beto na lukolo ya Lumingu, nsangu ya kumwangisa nsangu, kisika mpangi ya beto ya bakala vwandaka zonzila na Elie. Kisika yandi zolaka...Bana-babakala yayi, balukolo ya baprofete, mutindu bawu zolaka tunga lukolo mosi ya nene. Mpe ya kwizaka na dibanza ya munu, mpe mu vwandaka banza na mabanza ya “balubambuku.”

45 Ntangu yayi, lubambuku kele kima ya nene. Beto ke sepelaka na balubambuku. Mpe bantu mingi, na luzingu yayi, me meka na kubika na manima ya bawu mutindu mosi ya lubambuku. Na kutala bantu nyonso ke zolaka kusala yawu. Kutula na ndyamu ya bawu, kidimbu ya nene. Ya kele nyonso mbote. Kieleka. Mu ke sepelaka na yawu. Ya kele—ya kele ok. Mpe na yina bantu mingi ke mekaka na kutunga monima ya nene.

⁴⁶ Mosi ya lubambuku yina mu ke zola kulakisa ntangu yayi, ya kele na Ohio, mpe ya vwandaka na mumpani mosi. Mu me zimvana nkumbu ya yandi. Mu kele na foto kisika mosi kuna na koleksyo ya munu na yinzo. Kisika, yandi vwandaka kieleka ya kuswaswana na Buklisto, ti yandi zolaka lubambuku ya kutunga samu na yandi, na manima ya lufwa ya yandi, na dikulu ya yandi na zulu ya Biblia, ke lakisa na yisi mutindu *yina*, mpe kutuba, “Ntama na misambidi ya balukwikilu ya luvunu, mpe na ntwala na science ya bilumbu yayi.” Mpe ntangu yandi vwanza kufwa, yandi tubaka, “Kana mu vwanza na foti, banyoka ke basika na ntoni ya munu.” Mpe ntangu yandi kufwaka, ba vwanza kotisa kaka ntoto na kati ya ntoni mpe ba kufwaka zole to tatu ya bitumpa ya nene. Mpe bubu yayi, na maziami yina, longi mosi bakaka foto ntama mingi ve mpe yandi nataka samu na kutalisa yawu na munu, mpe ya kulelika na zulu ya miniololo pene ya diambu ya yandi. . . Maziami kele kisika ya kitoko, kasi mwa mongo ya fyoti kele kima mosi ve kasi mwa mongo ya fioka ya nyoka. Mpe ata ti, ata mpe na automne mpe hiver, banyoka ke komvula kaka na ntoni ya yandi. Lubambuku! Ti Nzambi kukeba munu na kuzwa lubambuku mutindu yina, to mosi na kati ya beno.

Na yawu ya kele na balubambuku, ata ti, balubambuku ya nene.

⁴⁷ Mu ke banza na Josué, munwani-mvita ya nene. Wapi mutindu ya muntu ya nene yandi vwanza, yandi yina bakaka kinwaninu ya Moise, mutindu ntwadisi ya mafuku zole yayi ya ba-Juif. Moise yina ba soolaka, yina ba bokilaka na kubasika, yina ba kabulaka samu na kisalu. Mpe Josué, kutelama mpe kubaka kisika ya muntu yina, ya kieleka ya vwanza kima ya nene ya kusala, samu na kulungisa basapatu ya profete yayi. Munwani-mvita ya ngolo, yina ba bokilaka, yina ba soolaka na ntwala mpe yina Nzambi tulaka. Bamvula bankama yiya na ntwala yandi kwiza, Nzambi tubaka ti Yandi ke vulusa mpe Yandi ke kwiza tala bawu. Mpe wapi mutindu munwani-mvita Moise vwanza!

⁴⁸ Ata mbala mosi ve ti muntu bakaka basapatu ya Moise, samu na kulungisa yawu, tii Yesu Klisto lendaka sala yawu. Mpe yandi tubaka, yandi mosi, “Mfumu Nzambi ya beno ke basisila beno Profete na kati ya beno, mutindu munu. Mpe ya ke salama, kana beno ke kuwa ve Profete yayi, muntu nyonso yina ke kuwa ve Profete yayi ba ke katula yandi.” Mbote mingi.

Ntangu yayi, lubambuku yayi ya nene.

⁴⁹ Mpe Josué kulumukaka na nzadi. Mpe na manima Moise kufwaka, Josué bakaka kisika ya yandi. Mpe Nzambi vwanza na Josué. Mpe yandi tubaka, “Ntangu yayi beno kukisantisa beno mosi, beno sukula bilele ya beno, mpe beno kabwana, mpe

beno vukana ve na bakento ya beno. Mpe na kilumbu ya tatu, Nzambi ke sala kima mosi.” Oh, munu. . .

⁵⁰ Mosi ya bampimpa yayi, balukutakanu ya Lumingu, mu zola kulonga na zulu ya yawu “kilumbu ya tatu,” mpe kulakisa beno wapi ngolo kele na kati ya bawu, na tatu yina. Mu tubaka yawu na suka yayi na kati ya kisambu, ti nyonso vwandaka na bima tatu na kati ya bantalu ya Biblia.

⁵¹ “Ntangu yayi, na kilumbu ya tatu beno ke mona nkembo ya Nzambi.” Ntangu yayi ya ke kwenda. . . zolaka lakisa ti yandi zabaka mbote yina yandi vwandaka zonzila, samu ti yandi tubaka kaka kieleka ntangu yina ya zolaka salama. Mpe mu lenda banza mutindu Josué kuwaka, ntangu yandi telemaka kuna na ntuala ya ba-Israelite nyonso yina. Ntangu yayi, ndinga ya yandi zolaka vwanda kieleka. Mpe ya vwandaka na Jourdain yina vwandaka ya kufuluka.

⁵² Beno me mona, nkadulu ya muntu me zabana na nzila ya bisalu ya yandi. Nyonso yina beno kele, bisalu ya beno ke lakisa yina beno kele. Ata wapi mutindu beno ke pesa kimbangi, ata nyonso yina beno ke tuba, ya mbote to ya yimbi, ya kele na kima ve ya kusala na yawu. Bisalu ya beno ke tuba yina beno kele, ke tuba yina beno kele na kati. Konso kisalu yina beno ke sala, ke talisa yina beno kele.

⁵³ Mpe beno bantu ya mumbungu, kana beno ke salaka kaka kisalu mosi ya kuyidika bima, beno me mona yina mu zola tuba, kusala kaka kisalu ndambu, beno sala yawu ve. Kana beno lenda sala yawu mbote ve, beno sala yawu ata fyoti ve. Ya kele kieleka.

⁵⁴ Ntangu beno ke kwiza na Klisto, kana beno lendaka ve kukipesa ya kieleka, nionso, ya kulunga mpe ya muvimba, mpe kukwiza na Klisto, beno kwiza ata fioti ve. Kasi ntangu beno zola ya kieleka kuvwanda Muklisto, beno vwanda ya kuswaswana. Sala yawu ya kieleka. Ya kele yina Nzambi zola ti beno vwanda. Mpe yina ke—yina ke lakisa, bisalu ya beno ke lakisa yina kele nkadulu ya beno. Nkadulu ya beno ke zabana na nzila ya bisalu yina beno ke sala.

⁵⁵ Mpe Josué, ntangu yayi, ndinga ya yandi vwandaka ke salama; yinga, tata, kaka mutindu—mutindu Noé ya ntama. Kasi Josué zolaka sabuka nzadi yayi. Mpe ya talanaka mutindu ti yandi bakaka ntangu ya kulutula yimbi yina ba lendaka banza ntete ve. Ya vwandaka na ngonda ya Yiya. Mpe ya kele ntangu mvula ya mpembe ke kituka maza na Judée, mpe ke kulumuka na myongo, mpe Jourdain ya ntama kele poto-poto, mpe ke mwangisa maza tii na—na bilanga, samu na kumwangisa maza na bilanga ya Jourdain. Mpe ya ke talana mutindu, ti kana ya zolaka vwanda landila mathematique, to—to ndongosolo, to landila science, yandi—yandi bakaka ntangu ya kulutula yimbi na mvula nyonso na kusabuka Jourdain. Kasi Nzambi ke zolaka

kubaka bantangu ya mutindu yina samu na kusiamisa ti Yandi kele Nzambi.

⁵⁶ Mpe bantu ya Nzambi, bayina ke kwikilaka na Nzambi mpe zaba yina Nzambi silaka, kele ve na boma ya kusala yawu, samu ti Nzambi ke kangama na Ndinga ya Yandi, kaka kieleka mutindu Yandi kele Nzambi.

⁵⁷ Mpe ntangu yandi tubaka, “Ntete, beno baka nzasa mpe beno kwenda na ntwala.” Mpe ntangu makulu yango ya banganga-Nzambi simbaka Jourdain yina, ya lenda vwanda yinki mutindu kuningana ya vwandaka, mpe yinki mutindu ya vwandaka ya kufuluka, ya pesaka nzila na Ndinga ya Kukonda nsuka ya Nzambi, samu ti Ndinga vwandaka na nzasa. Yesu tubaka, ntangu yayi, “Mazulu na ntoto ke luta, kasi Ndinga ya Munu ke luta ata fyoti ve.” Na yawu, Josué, na kuzabaka ti ndinga ya yandi fwana pema na zulu ya Ndinga ya Nzambi, mpe yandi tulaka ntete Ndinga ya Nzambi.

⁵⁸ Mu zola ti beno bambevo awa na nkokila yayi beno sala yawu, beno tula Ndinga ya Nzambi na kufunguna ya beno. Benotula kufunguna ya beno, beno kwikila yawu mpe beno tula yawu kuna; mpe beno bokila bima yina, yina kele ve, mutindu ti yawu vwandaka. Kuna beto ke landila na kukwenda na ntwala. Benosala yawu mutindu yina. Ndinga ya Nzambi ke lutisa yawu.

⁵⁹ Mpe mutindu makulu ya banganga-Nzambi simbaka Jourdain, yawu vutukaka manima, lweka yayi mpe yankaka. Mpe maza telamaka.

⁶⁰ Beno me bakula? Makelele ya kudasuka ya nzadi zolaka basisa kumu yankaka ya nzadi kuna, na baminuti makumi zole ya ntangu, ya zolaka vwanda nene mutindu—mutindu mwa babarrage ya nene ya bilumbu ya bubu yayi yina beto kele na yawu, mpe barrage ya Boulder ya Colorado kuna. Nzila yina Jourdain ke kombola kuna, ke basika na myongo, na ngolo ya nene, mpe yawu ke kombola na biwanda yina.

⁶¹ Mpe ntangu mafuku zole ya babakala na makulu, na bakento mpe bana, na kitezo kuna, mu banza ya bakaka bangunga yiya to tanu, to kulutila. Mpe yinki beno ke banza? Nzadi yina zolaka fuluka. Kasi, Nzambi kangaka maza. Amen. Oh, mu zola yawu. Yandi kangaka bamaza! Mpe ya vwandaka kuna tii kuna bawu lutaka.

⁶² Na yina Nzambi tubaka na Josué, “Beto zola sala lubambuka na yayi. Kwenda kuna mpe fidisa konso Israélite, mosi na konso dikanda, mpe ba baka matadi kumi na zole mpe kusala lubambuku. Mpe lubambuku yayi ke vwanda ti ntangu bana ya beno ke luta na nzila yayi, ba ke yufula, ‘Yinki salaka ti matadi yayi kuvwanda awa?’ Mpe nge ke pesa bawu disolo ya mutindu Nzambi kangaka Jourdain.” Yina kele lubambuku ya mbote. Kilumbu mosi mu banza na kutala matadi yango, pene-pene ya bilumbu na ntwala, ya kisika bawu ke telama

dyaka mutindu lubambuku. Kasi na yina mu ke banza na—na lubambuku yankaka . . . Wapi mutindu ya lubambuku ya nene ya kusakumuka yina vwandaka!

⁶³ Na yina mu ke banza na lubambuku yankaka, kilumbu mosi, ntangu kento mosi salaka nsodolo ya yimbi. Yandi bakaka ve lukanu ya kuvwanda na bandimba ke mwangisaka mbote maza ya—ya, to, kuvwanda na bandimba ke mwangisaka mbote maza ya Sodome mpe Gomorrhe, mpe kuvwanda muntu ke sadisaka bantu mpe kuzinga mutindu bakento nyonso yankaka vwandaka na bilumbu yina.

⁶⁴ Yandi salaka nsodolo ya mbote ve, mutindu Sarah yina vwandaka kuna na bayinsi ya kuyuma. Kaka, yandi bumbaka Ndinga ya Nzambi na kati ya ntima ya yandi. Mpe yandi vwandaka ya kutumama mpe ya luzolo na bakala ya yandi, na mutindu ti yandi vwandaka bokila yandi “mfumu” ya yandi. Mpe ya kele kisika Nzambi kulumukaka na Bawanzio zole mpe kwizaka tala bawu na kati ya tenta.

⁶⁵ Kasi, Mama Lot, yandi kumaka kieleka ya yinza mpe natamaka na bima ya yinza. Mpe wapi mutindu ya leso yina kele samu na beto, bubu yayi, ti beto lenda kuma na dibanza ya yinza mingi. Mpe mu ke ndima, bubu yayi, ti dibuundu, na muvimba, ke na kukumaka na dibanza ya yinza mingi. Ntangu yayi, mu banza, Mama Lot vwandaka zola ve kusala yawu, ntangu yandi kwendaka kuna. Yandi banzaka, “Mu ke vwanda kaka muntu ke sadisa bantu.” Ya kele nyonso ya kulunga na kuvwanda muntu ke sadisa bantu, kasi kubaka ve bifu ya yinza.

⁶⁶ Ntangu beno ke kwenda, beno kwenda mutindu Schadrac, Méschac, mpe Abed-Nego, mpe Daniel. Ba bakaka lukanu na kati ya ntima ya bawu ti ba zolaka sumuka ve, ata yina ke kwiza to ke kwenda. Ata ti kana bantu nyonso yankaka ya dibuundu kuvutuka manima, ata yina salamaka, ba bakaka lukanu na kati ya ntima ya bawu. Mpe ba kele lubambuku bubu yayi.

⁶⁷ Mpe Mama Lot me telama samu na lubambuku. Mpe ntangu Nzambi pesaka yandi nsangu yandi ya nsuka ya lemvo, ntangu Yandi fidisaka Bawanzio yango kuna mpe tubaka na bawu ti na bangunga fyoti ti Sodome na Gomorrhe ke yokama na tiya, kasi, yandi lendaka ve kundima mabanza ya kubika luzingu ya yandi ya kusadisa bantu, samu na kukwiza na ntoto ya kuyuma, mpe kuzinga mutindu Sarah zingaka kuna na ntoto ya kuyuma, mpe kulwata bilele ya mpamba-mpamba, bilele ya bakento nyonso, ya bakento ya ndimba. Yandi zolaka kuvwanda na kati ya bima ya kulutula kitoko mingi. Bakala ya yandi kumaka muntu ya nene na kati ya mbanza. Yandi vwanda vwandaka na mwelo, mutindu zuzi to mutindu mfumu ya mbanza. Mpe kento vwanda zolaka bima yayi ya kitoko mingi. Mpe yandi lendaka ve na kundima mabanza ya kubika bima yango. Mpe na yina yandi vwandaka kwenda na bakala ya yandi, na ngaanda ya mbanza,

yandi landilaka na kutala na manima, na kudilaka mpe na mawa samu ti yandi zolaka bika yawu, samu na kukabuka yandi mosi na kifwanikisu yina ya lufwa.

⁶⁸ Yesu tubaka, “Yandi yina ke tula diboko ya yandi na nsengo, mpe kaka ke baluka na kutala na manima, yandi kele ve ya kulunga na kusala bilanga.” Wapi mutindu ya bantu beto zolaka vwanda? Yandi yina ke tula diboko ya yandi na nsengo samu na kusala bilanga, mpe kaka ke baluka ve—ve na manima, kasi ke baluka kaka na kutala na manima, yandi kele kaka ve ya kulunga na kusala bilanga. Oh, beto zolaka bika meso ya beto mpe bantima ya beto santu. Ata yina bantu yankaka ke sala, yina dibuundu ke sala, yina mfinangani ke sala, yina muntu nyonso yankaka ke sala, beno bika ntima ya beno na zulu ya Calvaire. Beno telema kaka ve na manima. Beto ke na ntangu ve ya kutala na manima.

⁶⁹ Mpe kento yayi, samu ti yandi salaka yawu, Nzambi pesaka lubambuku na bantu nyonso yina balukaka samu na kutala manima, na manima bawu ndimaka mbala mosi Klisto mutindu Mvulusi ya bawu mosi. Yandi kitukaka dikunzi ya mungwa. Mpe yandi me telama kuna na kilumbu yayi, ba lendaka mona yawu na kati ya bilanga, ti kento yina me telama kuna na yintu ya yandi ya kubaluka, ke tala na manima. Mpe yandi ke na kutalaka na manima na dipeka ya yandi ya kikento, samu na kutala na manima na bilanga. Ntima ya yandi vwandaka kuna na manima. Kasi, mutindu ti, ba tumaka yandi na ngolo, na kusala yayi.

⁷⁰ Mpe bantu mingi ke bakaka Klisto mutindu yina, bubu yayi, samu ti bawu me basika na yinza, ke kuwa mutindu ba vwandaka tuma bawu na kusala yawu. Mpe bawu ke landila na kusosa mpe kulula bima yina, mpe ntama mingi ve bawu ke vutuka. Mpe bawu kele—bawu kele balubambuku ya boma ya lemvo ya Nzambi, ya zola ya Nzambi mutindu ya me talisama na bawu. Ntangu yayi, balubambuku!

⁷¹ Ntangu yayi, na bilumbu ya Yesu, na zulu ya ntoto, ba-Juif tungaka tempelo mutindu lubambuku. Mpe ba talisaka Yesu mutindu mbote ba tungaka tempelo yina. Mpe Yandi tubaka... Ya bakaka bamvula makumi yiya samu na kutunga tempelo; pene ya bamvula makumi nana, na mutindu nyonso. Bamvula makumi yiya, ba vwandaka zenga matadi na bitini ya kuswaswana ya yinza. Bamvula makumi yiya na ntungulu ya yawu, ata makelele ve ya dingwengwe to makelele ve ya nzundu.

⁷² Kasi, beno zaba, mpe Yesu tubaka kuna, “Beni tala ve na yayi, samu ti mu ke tuba na beno, ti ya ke kwiza ntangu ti ya ke vwanda ve na ditadi mosi yina ke bikana na zulu ya yankaka, ditadi mosi na zulu yankaka.”

⁷³ Kaka ntete, Yandi tubaka Bampova yayi ya nene ya lubambuku, “Mazulu na ntoto ke luta, batempelo ke luta,

balubambuku ke luta, kasi Ndinga ya Munu kele lubambuku ya kukonda nsuka.”

⁷⁴ Nzasa me bola, bamvula me luta. Bantoni ya baprofete kubwaka. Mpe balubambuku nyonso yankaka me beba, landila ntangu, me katula ditadi. Kasi Ndinga ya Nzambi kele kaka mutindu mosi, ya kitoko ntangu nyonso mpe ntangu nyonso. Kaka mutindu ya moyo mpe ya madidi na nkokila yayi, samu na bakwikidi ya kilumbu yayi, mutindu Yawu vwandaka bilumbu yina ba zonzaka Yawu.

⁷⁵ Kuyituka ve, Elie, na suka yayi, na ya beto . . . nsangu yina mpangi ya beto ya bakala vwandaka me pesa beto. Ntangu ba zolaka kutunga lukolo ya nene samu na baprofete, mutindu lubambuku, kasi Elie soolaka kima ya kulutula mbote, kimangu ya Nzambi na kuzangula kisalulu yina kubwaka mpe kusala ti ya leluka na zulu ya maza. Ya vwandaka Ndinga ya Mfumu.

⁷⁶ Mpe kulutula mbote yandi kele, na nkokila yayi, yandi yina ke kuyamba Ndinga ya Mfumu, na kati ya ntima ya yandi, samu na lubambuku, kulutula bayina ke meka na kutunga lubambuku mosi ya nene.

⁷⁷ Ntama mingi ve, ntangu mu kuwaka, ntangu mu vwandaka na Italie, Mu kuwaka na Mussolini, mpe kiteki yina ya nene ya kumi na zole ya bametele ya zulu, yinda, yina yandi tungaka mutindu lubambuku na athlétisme, na yina yandi vwandaka athlete. Mpe mu vwanda zola kutala lubambuku yina. Mpe, beno zaba, ba kumisaka yawu mfututu na nzila ya blockbuster ya nene.

⁷⁸ Mu telemaka, pene ya bamvula zole, tatu me luta, na kisika yina ba-pharaon ya Egypte telemisaka batempelo mpe biteki ya nene. Mpe mu . . . Ba tubaka na munu ti nge fwana timuna bametele sambanu na yisi ya ntoto, na kutala kaka ntoto kisika balubambuku yango vwandaka.

⁷⁹ Mu telemaka kisika César Auguste, kisika ba-Herode mpe bantu ya nene ya Rome vwandaka. Mpe mu kwendaka na bala-bala, mpe kisika yandi vwandaka tambula na bala-bala katuka yinzo ya ntinu, mpe ya kele pene ya bametele nana na nsi ya ntoto. Balubambuku yango me zimbanaka.

⁸⁰ Kasi Ndinga yina ya moyo ya Nzambi kele dyaka kaka mutindu mosi mpe kaka na luvalu. Yawu yina lubambuku.

⁸¹ Na yawu mu ke tuba, bubu yayi, mpangi, bima yina beno ke sala, bandinga yina beno ke tuba, mutindu beno ke sala mfinangani ya beno, mpe yina beno ke sala samu na Klisto, ke vwanda lubambuku ya kukonda nsuka. Beno lendaka vwanda na yinzo ya mbote ya kubika na bana ya beno. Beno lendaka vwanda ke sala samu na bima, ya kubika samu na bana ya beno. Kasi mu ke zola mingi kubikila bawu Ndinga ya Nzambi kulutula kima nyonso yankaka. Bayinzo yango ke zimbana. Ya kele kieleka nyonso ya kulunga, ya kele mbote. Mu kele na dyambu ve ya

kutelemina yawu. Kasi beno sala ve bima yango ya fyoti mpe kubika bima ya nene kusalama, beno me mona. Samu ti, Ndinga ke. . . Yinzo ke beba, mpe bantu ke beba na yawu. Kasi Ndinga ya Nzambi ke vumbula bawu na bilumbu ya nsuka, mpe ke pesa bawu Luzingu ya Kukonda nsuka mpe yina ke kufwaka ve mbala mosi dyaka. Mpe, ntangu yayi, samu na kusala kima ya kubika na bana mutindu yayi, Ndinga ya Kukonda nsuka ya Nzambi!

⁸² Mu ke banza na nkunga yayi ya ntama yina beto vwanda yimbaka awa, bamvula me luta:

Ntangu kele ya kufuluka na nsodolo ya nswalu,
Ya ke na kima mosi ve na ntoto yina ke telama,
Tunga kivuvu ya nge na zulu ya bima ya
Kukonda nsuka,
Simba diboko ya Nzambi yina ke sobaka ve!

Ntangu nzyetolo ya beto ke suka,
Kana na Nzambi beto vwandaka kieleka,
Yinzo ya beto ya kitoko na Nkembo,
Moyo ya beto ya kyese ke mona!

⁸³ Wapi mutindu ya kulutula mbote ya kele na kutala, na ntwala ya kulala ya mwini, ntangu misisa ya beno ke kuma madidi na nzutu ya beno, ntangu bana ya beno me telama pene-pene ya mbeto, na kuzabaka ti beno kele na lubambuku, ti, “Ba-cheri, kilumbu mosi papa ke kutana na beno na simu yina yankaka!” Mu ke zola mingi kuzwa yawu.

⁸⁴ Ntangu dokotolo ke tuba, “Billy, kima mosi ve lenda salama samu na nge.”

⁸⁵ Mpe mu ke mona bana ya munu, mpe mu ke pesa bawu beze ya mbote ya nsuka. Mu ke tuba, “Kasi papa ke na kufwa ve. Yandi ke na kwenda na kupema, na Kisika mosi. ‘Samu ti kana tabernacle ya ntoto yayi kubeba, mu kele na mosi yimeni yina ke na kuingila.’” Wapi mutindu ya lubambuku samu na kuzonzila! Mu ke zola mingi kusala yawu, na ntwala ya bana ya munu, na kisika ya kutuba, “Ba-cherie, mu ke na fuku ya ba-dollar na banke *yayi*, mpe fuku yankaka awa na yandi *yayi*, samu na beno.” Mu ke zola mingi kubika kimbangi yina.

Na kukwendaka, kubika na manima ya beto
Bitambi na zulu ya zyelo ya ntangu;
Bitambi, yina mu banza yankaka,
Na kuzengaka maza ya luzingu,
Mpangi ya mawa mpe ya kudyama,
Na kumonaka, ke baka dyaka ntima.

Ya kieleka! Beno bika yawu samu na lubambuku, bimbangi ya beno.

⁸⁶ Mutindu mu ke banza, na nkokila yayi, na kiboba ya bakala yina kele ya kulala kuna, na bangunga ya yandi ya nsuka ya luzingu yayi, bokilaka kilumbu yankaka yina mpe zolaka ti mu

longa na mafwa ya yandi; na Tabernacle ya Paul Rader. Yina kele nkundi ya munu ya mbote, F. F. Bosworth, santu mosi ya kukipesa yina vwanda kwenda kutana na Kiyidiki ya yandi. Mpe yandi tubaka, “Yayi kele ntangu ya kulutula kitoko ya luzingu ya munu, Mpangi Branham.” Yandi tubaka, “Mu kele na kyese mingi na kuzaba ti mu ke kwenda kutana Yandi, na mpasi mu lenda lala na mpimpa.”

⁸⁷ Mu me kuwaka na Mama Aimee McPherson; ve na kuvweza na yandi, kento mosi ya kitoko. Mu ke mona bidimbu na *yayi* mpe *yina*. Mu ke mona bidimbu ya Smith Wigglesworth mpe Docteur Price, mpe mingi ya bantu yango ya nene, kasi ata kidimbu mosi ve mu me kuwaka ntete muntu kutuba na yina me tala F. F. Bosworth. Nzambi, bika nsuka ya munu kuvwanda mutindu yina, lubambuku ya lemvo ya Mfumu Yesu Klisto!

⁸⁸ Mu ke banza na E. Howard Cadle awa, ntama mingi ve, ntangu yandi vwandaka ya kulala na ntoto, mutindu kinwa-malafu vwanda bula nsaka ya mbongo, mpe—mpe banzinzi kutambula na yinwa ya yandi. Mpe mama ya yandi ya luzolo kuna sambilaka mpe kwikilaka, mpe kangamaka na Nzambi, samu na mwana ya yandi bakala ya kinwa-malafu. Kuna, ntangu yandi bikaka yinza, yandi bikaka kimbangi mpe lubambuku ya lemvo ya Nzambi ya Ngolo nyonso yina kele ya kulunga. Ntangu Ndinga ya Nzambi me tulama na Yandi, na kisambu, Nzambi fwana pesa mvutu samu na yawu.

⁸⁹ Nzambi ke na kutungaka Dibuundu mutindu lubambuku, lubambuku ya munkayulu ya Yandi. Klisto kwizaka ata mbala mosi ve na ntoto samu na kufwa ya mpamba. Lufwa ya Yandi ke vwanda ve ya mpamba. “Nzambi kele na lenda na matadi yayi na kubasisa bana na Abraham.” Kana bantu ke zinga Yawu ve, kana bawu kuzwa Yawu ve mpe, na ntima, mpe kubakula wapi dikabu ya nene yina Nzambi me pesa bawu, Nzambi kele na lenda na matadi ya kubasisa bana samu na Abraham. Kieleka Yandi ke sala yawu! Mpe ntangu mu ke banza na yawu, mpe kubanza na ntalu ya nene yina Yandi zolaka kufuta! Ntangu yayi mbote. . .

⁹⁰ Muntu nyonso ke zola kima nyonso ya mpamba, ke zola konso. . . Ya kele mutindu ya Amerika ya kuzinga bubu yayi. Kuzwa kima nyonso yina beno lenda, na kima ve. Mpangi, beno ke kuzwa kima ve yina kele mfunu, samu na kima ve. Beno ke futa samu na yina beno ke kuzwa. Ya kele kieleka. Beno fwana futa samu na yawu, mpe ya ke ntalu mingi.

⁹¹ Mpe mpulusu ya beno kele ntalu mingi, na Nzambi. Ya futamaka na Mwana ya Yandi mosi, samu na kupesa Luzingu ya Kukonda nsuka na muntu nyonso mpe kukumisa yandi muntu ya kyese, na nkokila yayi, mpe kuzinga samu na bima yina kele na mfunu ya kuzinga samu na yawu. Ve samu na kubika kima mosi na bana ya beto; ata difwa ya kubika, ya kulutula nene na mpulusu ya Mfumu ya beto Yesu. Ya kieleka, ya kele ve.

⁹² Ntangu yayi, bantalu ya nene me futama. Ntangu ya kumekama fwana kwiza. Ya kele ntangu ya kumeka balubambuku. Mpe lubambuku yina kaka ba me mekaka ntete mbote, me vwandaka Ndinga ya Nzambi. Oh, bantu ya kukwikama ve mekaka na kufwa mwinda ya Yawu. Bawu me sala nyonso yina bawu lendaka sala, kasi ata mbala mosi ve ti Yawu ke luta. Yawu lenda kubwa ata mbala mosi ve.

⁹³ Abraham, ntangu yandi kuzwaka lubambuku yina ya Nzambi, “Nge ke kuzwa bébé na nzila ya kento yina, Sarah.” Bamvula makumi zole na tanu, yandi kwikilaka yawu na ntima ya yandi ya muvimba, mpe mangaka kima nyonso ya kuswaswana na yawu, samu ti yandi zabaka ti Nzambi ke zitisa Ndinga ya Yandi.

⁹⁴ Bantu ya kukwikama ve, bubu yayi, bawu ke telama mpe ke meka na kukumisa mvindu Biblia. Ntete beno kanga Biblia, beno fwana sukisa ntangu ntete beno sala yawu. Muntu nyonso mumangi-Nzambi, bantu nyonso bamangi-Nzambi, bantu nyonso ya communisme, mpe nyonso yina bawu kele, muntu nyonso ya Buddha, muntu nyonso ya Jaïn, konso Musulman, fwana pesa kimbangi ya mbutukulu ya Mfumu Yesu Klisto, konso kilumbu. Mbote, konso ntangu beno ke sonika mukanda, amen, konso ntangu beno ke sonika kilumbu, beno ke pesa kimbangi ti Nzambi fidisaka Mwana ya Yandi, bamvula funda mosi na bankama yivwa na makumi tanu na sambwadi me luta. Mpangi, beno zolaka sala yawu ve. Ya zolaka vwanda ata fyoti ve. “Mazulu na ntoto ke luta, kasi Bandinga ya Munu ke luta ata fyoti ve.”

⁹⁵ Mwa ntangu me luta, mu vwandaka na New York, mu kwendaka na mwa kisanga mosi, na Kiteki ya Kimpwanza yina ba pesaka na . . . na luyalu ya France, na Etats-Unis, bamvula mingi me luta. Mpe na diboko kele na mwinda ya torche. Beto kwendaka na diboko yina. Ya kele na nela kuna. Mpe kisika mwinda yayi ya nene vwandaka sema, Mu talaka nzila nyonso ya kibaka, ya vwandaka na mwa nkonga ya banswini, mpe bawu vwandaka nyonso ya kufwa, ya kulala na lweka. Mpe mu tubaka na ntwadisi, “Samu na yinki banswini yango? Bawu kufwaka na lutiliki?”

⁹⁶ Yandi tubaka, “Ve, tata. Beto me lokota bawu ntete ve na suka yayi.” Yandi tubaka, “Mazono na nkokila ya vwandaka na kitembo mosi, kitembo mosi ya nene kwizaka pene-pene ya baie awa.”

Mu tubaka, “Yinga, tata. Mu zaba yawu.”

⁹⁷ Yandi tubaka, “Mwa bana yango ba me baka bawu na kati ya kitembo.” Mpe yandi tubaka, “Ntangu bawu kumaka na mwinda yayi, bawu mekaka na kufwa mwinda. Nge me mona? Bawu tutanaka kaka na kitala-tala yayi mpe bulaka yawu.” Mpe yandi

tubaka, “Na kisika ya kusadila mwinda samu na kuvwanda na lukengolo, bawu mekaka na kufwa mwinda.”

⁹⁸ Mpe na yina lutwadusu ya kimpeve bulaka munu. Ya kieleka. Babakala mpe bakento yina ke na kumeka na kufwa Mwinda ya Nzambi, ke na kufwaka kaka bayintu ya bawu. Mpe, Mwinda, samu na yinki bawu ke sadilaka Yawu ve samu na kuvwanda na lukengolo, na kisika ya kubula bayintu ya beno? Ke meka mpe ke manga Yawu, mpe ke tuba, “Bilumbu ya bimangu me lutaka. Ya kele ve na kima mutindu kubeluka ya Kinzambi, ata mpulusu yina ke simbaka ntima, ata bima yayi.” Bawu ke na kubulaka kaka na zulu ya poto. Ntangu nyonso yina bawu ke sala yawu, Dibuundu ya nene ya Nzambi ke na kulandila na kukwenda na ntwala mpe na ntwala, kaka na mpasi mutindu ya lendaka sala. Bantu ke telama mpe ke tuba ti bawu kele *yayi*, mpe *yina*, mpe ke kubwa, mpe nyonso yina. Kasi Dibuundu ya Nzambi ke kwenda na ntwala, mpe Ndinga ya Nzambi ke kwenda na ntwala. Yandi kele ya kusala na mutindu ya bisadilu ya mbote.

⁹⁹ Ntama mingi ve, kuna na Australie, na Australie ya nene yina kele na yisi ya yimpu ya kimfumu ya ba-Britanique, ya kele mutindu Afrique du Sud, yina kele na kutala simu mosi na yankaka ya Australie. Kuna na Sydney, ya kele na mbanza mosi ya nene yina ke kwizaka na ziunga ya maza kuna, Mpangi Beeler na kutala zaba mingi na yina me tala yawu kulutila munu. Na mutindu nyonso, bawu vwanda zola kutunga kyamvu, ke vukisa katuka—katuka Sydney ya Nord na Sydney ya Sud. Bawu bokilaka na yinsi ya muvimba, samu na kuzwa ba-architecte, mitungi-kyamvu, na kwiza tunga kyamvu yayi. Ata mosi ya bawu ndimaka yawu. Ata mosi mekaka na kundima yawu. Ntangu bawu vwandaka kuma kuna, bawu vwandaka tala ti yisi ya mubu vwandaka zyelo ke dyamisa. Ya vwandaka zyelo ke diamisa, mpe ti kima ve zolaka telama. Mpe bawu mekaka yawu mpe fyongoninaka, mpe landilaka nzila ya bawu. Bawu tubaka, “Ve, beto ke meka ve na kutunga kyamvu ya mutindu yina. Ya lendaka salama ve.”

¹⁰⁰ Na manima ya mwa ntangu fyoti, ntwenya mosi ya architecte katukaka Angleterre kwizaka, muntu ya kuzabana, muntu ya lukumu, yandi vwandaka na lukumu ya mbote.

¹⁰¹ Oh, mu ke zolaka yawu! Mu ke zolaka muntu na lukumu. Oh, beno fwana vwanda ve muntu ya nene. Beno lenda vwanda muntu ya kyadi yina ke zingaka na bala-bala, mpe kuvwanda na lukumu mingi kulutila muntu ya nene ya luyalu ya politiki. Ya kieleka. Beno fwana vwanda ve mvwama. Beno lenda vwanda kaka na lukumu. Ya ke tuba, lukumu ya beno mpe yina beno kele, ke sala beno yina beno kele. Ya ke pesaka beno lukumu ya beno. Mpe beno me zabana na lukumu ya beno.

¹⁰² Bakala yayi kwendaka kuna na lukumu ya kitoko. Yandi talaka dyambu yango. Yandi tambulaka na simu yina bilumbu

fyoti. Yandi longukaka yawu. Yandi mekaka yawu. Yandi fyongoninaka yawu. Yandi talaka na ziunga. Na manima ya mwa ntangu fyoti, yandi kwendaka na mfumu ya mbanza, yandi tubaka, “Mu me ndima kisalu.”

“Kasi,” yandi tubaka, “tata, nge zaba yina nge ke na kundima?”

Yandi tubaka, “Mu me bakula mbote-mbote.”

¹⁰³ Yandi tubaka, “Mbote, architecte yayi ya nene tubaka . . . ba-architecte ya Amerika mpe ba-architecte ya bisika nyonso na yinza, mitungi-kyamvu, me kwiza awa, mpe bawu keke na boma ya kisalu.”

¹⁰⁴ Yandi tubaka, “Kasi, tata, mu ke na boma ya kisalu ve. Mu me ndima yawu.” Yandi tubaka, “Mu zaba mbote ti mu keke na lukumu na yinza ya muvimba, mutindu mutungi-kyamvu; kasi mu ke tula lukumu ya munu na ntembe, samu ti mu lenda tunga yawu.” Oh, yandi vwandaka na vision! Na ntwala muntu lenda sala lukumu, yandi fwana vwanda na vision ya yina yandi ke na kusalaka.

¹⁰⁵ Oh, nkembo na Mfumu! Ya keke samu na yina ti ya keke na Mazulu ya kukwenda kuna. Ya keke samu na yina beto lenda kuzwa lukumu mutindu Muklisto, beto zaba wapi kisadilu keke na kati ya yinzo yayi. Ya keke kieleka. Ya keke Menga ya Yesu Klisto keke na kati ya yinzo yayi. Ya keke kieleka. Menga ya Yandi ya ditona sukulaka masumu nyonso. Yandi bakaka munu na babala-bala ya difelo mpe salaka munu kisadi ya Yandi. Na yina, mu ke kwikilaka na Yandi. Na yawu, mu me luta lufwa na Luzingu. Mpe konso mukwikidi me sala yawu, samu ti bawu me tula kivuvu mpe bawu ke kwikila na Mutungi yayi ya nene, mpe Architecte yayi ya nene.

¹⁰⁶ Ntangu yayi, ntangu muntu salaka yawu, kima ya ntete yandi salaka, samu na kundima ti yandi vwandaka kieleka, yandi kulumukaka kuna. Mpe yandi tubaka, “Ntangu yayi, ntete beto banda kyamvu yayi, beto fwana kuzwa lufulu ya ngolo. Beto fwana kuzwa yawu.” Yandi zabaka ti na yisi ya zyelo yina, dibeke ya ntoto vwandaka kuna, yina vwandaka ditadi ya ngolo. Yinki yandi salaka kasi kuzwaka ba-pompe ya nene? Mpe kotisaka kuna mpe tulaka ba-tube ya nene na yisi, mpe yandi fulaka zyelo ke diamisa, na ba-pompe yayi, yandi fulaka yawu tii kuzwaka ditadi ya ngolo. Ntangu yandi kuzwaka ditadi, yandi kangaka kuna ba-boulon yayi ya nene, mpe kukubikaka yawu. Mpe yandi konso kisika fulaka na kubendaka na ngaanda.

¹⁰⁷ Mpe na manima yandi kwendaka kuna mpe kuzwaka, pene-pene ya yandi, ba-architecte nyonso ya mbote yina yandi lendaka kuzwa, bantu ya kulutula mayele, bisadilu ya kulutula mbote. Yandi katulaka ntama asiye samu na kyamvu ya yandi. Ntangu yandi salaka yawu, yandi zolaka tula ve kitini mosi ya asiye, ata mpe boulon mosi ve, tii ya zolaka vwanda ya kumekama landila

science; na kumona kana ya vwandaka na kisika mosi ya mupepe na kati ya yawu, na kumona kana ya vwandaka na mwa mabulu ya mupepe kisika, na ntangu ya nsalulu ya yawu na yinzo ya kunienia-bima, kisika bawu salaka yawu mpe vukisaka yawu, samu na kumona kana ba mekaka yawu mbote. Oh, wapi—wapi lubambuku yina ke vwanda, kana . . . samu na lukumu ya yandi mutindu mutungi-kyamvu.

¹⁰⁸ Kana yandi bakaka mpasi yina nyonso, samu na kundima ti kyamvu ke vwanda na lukengolo, wapi mutindu mpasi beno ke banza ti Nzambi bakaka, samu na kundima ti Dibuundu yayi ke vwanda na lukengolo? Yinga, tata. Ya kele na lubambuku samu na lufwa ya Klisto, ya kele Dibuundu ya Yandi. Bantu yankaka ke zolaka ve kuzinga na yawu, bantu yankaka ke sala yawu. Kasi, ya kele ntangu ya kumekama. Nzambi ke na kumekaka bantu, bubu yayi, samu na balubambuku ya Yandi.

Bambala mingi, bantu ke tubaka, “Oh, mu kele ya kumekama mingi!”

¹⁰⁹ Nkumbu ya Mfumu kusakumuka, samu na bampukumunu! “Ntangu mu kele ya kulemba, kuna mu ke na ngolo,” Paul tubaka. “Konso mwana yina ke kwizaka na Nzambi, fwana mekama mpe tezama ntete.” Mpe bakumekama yayi kele mbote mingi samu na beno, mpe ntalu mingi samu na beno, kulutula wolo ya ntalu. Ya ke ntangu ya kumekama.

¹¹⁰ Bamvula mingi me luta, ntete bawu kuzwa bayinzo ya kuniena-bima, bawu vwandaka baka wolo . . . Mpe mutindu bawu zolaka zaba mutindu ya vwandaka mbote to ve, mpe poto-poto nyonso me katuka na yawu, bisengo nyonso ya pyrite (yina kele wolo ya bilawu), ti yimbi nyonso vwandaka me katuka na yawu, bawu . . . Bantu ke bulaka vwandaka bula yawu, mpe vwandaka bula yawu mpe vwandaka balula yawu, mpe vwandaka bula yawu mpe vwandaka balula yawu, tii muntu ke bulaka monaka kifwani ya yandi—ya yandi na kati ya wolo.

¹¹¹ Ya kele mutindu Nzambi ke salaka Dibuundu ya Yandi. Yandi pesaka beno kumekama na manima ya kumekama, kutezama na manima ya kutezama, kumekama na manima ya kumekama, kuteza na manima ya kuteza, tii kuna Luzingu ya Klisto ke talisama na luzingu ya beno; tii kuna beno ke kuma ya ngemba, ya lembami, ya lutondo, ya mbote, ya kukikulumusa, ya kukubama, ya kutumama, ya kukipesa, ya kubalula yintu ya beno na bima ya yinza, mpe kutala mbala mosi na Calvaire, na Yandi Yina ke na kubulaka. Bambala mingi beno ke banza ti ya kele ngitukulu samu na bakumekama ya tiya, bimbevo, mpe balukwamusu. Ya kele kaka ya kusala na kumeka beno, samu na kubasisa mvindu na beno, samu na kubasisa yimbi na beno, samu na kubasisa bubolo na beno, samu na kuvumbula beno na kisika yina beno lenda tala mpe kumona kifwani, to muntu lenda

mona kifwani ya Klisto na kati ya beno, “Klisto na kati ya beno, kivuvu ya Nkembo.”

¹¹² Yandi mekaka konso kitini. Na nsuka, yandi . . . Ntete yandi tula boulon, yandi mekaka yawu. Yandi mekaka nyonso.

¹¹³ Na manina ntangu yandi kuzwaka yawu nyonso ya kusala, ntangu yayi, bantu ya masawula telemaka pene-pene mpe tubaka, “Ya ke simba ve. Ya ke lenda ve.”

¹¹⁴ Ya kele yina bawu ke na kutubaka bubu yayi. “Yayi awa nsambulu ya Mpeve-Santu beno ke na kuzonzila, ya ke vwanda ntangu ya yinda ve, yinti yina ke yokama.” Kasi ya ke na kuyokama ve.

¹¹⁵ Oh, tiya ke tulaka kaka yawu maza. Ya ke pesaka beto kaka kivuvu ya malu-malu. Ya ke kaka—ya ke pesaka kaka yawu ngolo; konso kuteza, kumekama. Konso ntangu mupepe ke bulaka yinti mpe ke ningisaka yawu manima mpe mantwala, mpe manima mpe mantwala, ya ke zibula kaka nzila na misisa samu ti ya lenda kukota na mudindu mingi mpe kuzwa kusimba ya mbote. Konso ntangu kimbevo ke bula yinzo ya beno, konso ntangu bamfinangani ke tuba kima ya yimbi na zulu ya beno, ya ke ningisa kaka beno, ke zibula beno nzila, samu beno kulumuka mpe kuzwa kusimba ya mbote na Ditadi ya Seko ya Ndinga ya Nzambi yina ke ninganaka ve. Ya kele mutindu Nzambi ke salaka yawu. Yandi ke fidisaka bakumekama yango samu na kumeka beno mpe samu na kulakisa beno, samu na kuningisa beno mpe kupesa beno kusimba ya malu-malu.

¹¹⁶ Na manina beto ke mona ti, ntangu yandi kuzwaka nyonso yina me salama, bantu ya masawula telemaka pene-pene mpe tubaka, “Ya lenda tambula ve.” Kasi yinki? Architecte zabaka ti kyamvu ya yandi zolaka simba. Yandi zabaka ti yawu zolaka, samu ti yawu kumekamaka.

¹¹⁷ Ya kele samu na yina Nzambi tubaka, “Mu ke kuzwa Dibuundu kukondwa ditona to mifutu.” Amen. Yandi lutaka na nzila ya kumekama. Mpe konso mwana yina ke kwizaka na Nzambi fwana kumekama.

¹¹⁸ Na kilumbu yina ya nene ya lubambuku, ntangu ba zolaka kwenda, ntangu balweka nyonso zole zolaka banda na balweka zole, samu bawu kutana na kati-kati ya baie, muntu yina tungaka yawu, yandi tubaka, “Mu ke lomba muntu mosi ve.”

¹¹⁹ Ba-architecte nyonso telamaka pene-pene, bawu tubaka, “Kaka na ntangu kuningana mosi ke bula kyamvu yina, yawu ke kwenda mbala mosi na yisi. Ya ke vwanda ya boma.” Ata kompani ya assurance ke pesa yandi assurance na yawu.

¹²⁰ Yandi vwandaka ve na nsatu ya assurance. Yandi tubaka, “Kyamvu ya munu ke simba.” Yandi vwandaka na kivuvu. Ntangu yayi, yandi fwana meka yawu, samu ti lukumu ya yandi

kele ya kutula na ntembe. Ya kieleka, ya kele. Mpe kana ti ya simbaka, ya zolaka vwanda lubambuku.

¹²¹ Ya kele samu na yina mu zaba ti mpulusu ya ntangu ya ntama, ya Nzambi, yina ke simbaka ntima ke simba: lukumu ya Klisto kele na yawu. Yandi ke pesa beto ve kima mosi samu na kutunga Dibuundu, théologie yina muntu me sala ve, ve na zulu ya kimbangi mosi ya lukolo, to kutunga seminere mosi mutindu bawu zolaka, na suka yayi, samu na kupesa malongi na milongi. Mulongi ya kieleka ke katukaka na seminere ya lemvo ya Nzambi, yina Nzambi me bokila, mpe ya kele ntangu ya kumekama. Ya kele kieleka. Ya ke simba. Nzambi kele na kivuvu na beno. Beto kele na kivuvu na Yandi. Kyamvu ke . . . Powete ya ntama tubaka:

Kizundu ya munu kele ya kusimba na kati ya
vwale;
Na konso zulu mpe mupepe ya ngolo,
Kizundu ya munu kele ya kusimba na kati ya
vwale.

¹²² Beto zaba ve yina kele na kusimbaka, kasi Kima mosi kele na kusimbaka. Ya kele kieleka. Kento kele ya kukangama kuna na kiswamunu. Mpe ya kele na nsinga ya mpulusu yina ke simbaka ntima ya muntu, ti muntu yina me butuka mbala ya zole me luta lufwa na Luzingu. Bampeve nyonso ya yimbi na difelo lendaka ve kusala yandi ntembe na yawu. Ya kele na Kima mosi kele na kusimbaka na kati kuna. Bika ti yandi kwenda lweka mpe yankaka! Bika ti yandi ningana! Amen. Yandi ke simba, ntangu nyonso, samu ti ya kele na kati ya Klisto Yesu.

¹²³ Na yina muntu yayi tubaka, “Mu ke lomba muntu mosi ve, kasi,” yandi tubaka, “Mu ke kwenda, munu mosi.”

¹²⁴ Mfumu ya mbanza kwizaka mpe tubaka, “Tata, ya kieleka mu ke tula kivuvu na kyamvu ya nge.”

¹²⁵ Yandi tubaka, “Kana nge ke tula kivuvu na kyamvu ya munu, landa munu. Mbote mingi, tula yawu na kumekama.”

¹²⁶ Mfumu ya mbanza tubaka, “Ditoma ya munu ke vwanda kuna na suka mosi yina. Mu ke kwenda na nge.”

¹²⁷ Kompani ya nzila ya masini bokilaka na alo-alo mpe tubaka, ba bokilaka mpe tubaka, “Tata, beto ke tula kivuvu na kyamvu ya nge. Beto ke kuzwa . . .”

¹²⁸ Yandi tubaka, “Kana beno ke tula kivuvu na kyamvu ya munu, beno nata ba-locomotive yiya ya kifuluka, beno tula yawu na zulu ya kyamvu. Kana beno kele na kivuvu, beno landa munu. Kana beno ke kwikila ti ya kele ya kuteza mpe ya kumekama, beno ke kwikila yawu, beno kwiza, beno kwenda na munu.”

¹²⁹ Mpe na kumonaka kikesa ya yandi, bantu mingi sonikilaka yandi mikanda. Yina bantu ke na kususaka, kele bantu ya kikesa, ve bayina ya mwa kulemba.

¹³⁰ Kana beno banza ti beno lenda kwenda na ntwala mutindu yina, na kukwendaka na dibuundu mpe kutuba “amen” mbala mosi na mwa ntangu fyoti, mpe na kubokaka mwa fyoti, kutula nkumbu ya beno na buku, mpe kuvutuka mpe kuzinga mutindu dyabulu, bisalu ya beno mosi ke lakisa yina beno kele. Nkadulu ya beno me lakisa yawu. Kasi Nzambi . . .

¹³¹ Yinza zola kumona bantu yina kele na kikesa, muntu na kikesa, yina ke telama, mutindu lubambuku ya lemvo ya mpulusu ya Yesu Klisto. Ya kele kieleka.

¹³² Kilumbu yina ntangu kyamvu zolaka banda, bayankaka ya bawu vutukaka, bawu tubaka, “Beni kubama. Beni kubika ba-camera ya beni,” bawu nyonso, minati-nsangu tubaka, “samu kyamvu yina ke kubwa.”

¹³³ Ntwenya ya bakala yina belamaka kuna na kyamvu yina, me tula ditoma ya yandi kuna, me tala na manima, yandi me mona ba-locomotive yina nyonso ya tandama, yandi me mona kuna mfumu ya mbanza ke na kupepisaka na yandi diboko. Yandi talaka mpe yandi monaka makumi ya mafunda ya bantu ya kutelama na manima kuna, ya kukubama na kutambula na yandi. Yandi tubaka, “Bula fanfari.” Mpangi, ntangu fanfari bandaka na kubula, ti lusibu bandaka na kuwakana, ti baklaxon me banda na kuwakana, Mu zola kutuba ti ya vwandaka na kuningana mosi ya ngolo yina salamaka. Kasi yandi sabukaka kaka kyamvu yina, mpe yawu ninganaka ata fyoti ve. Samu na yinki? Yandi bakaka mantwala, samu ti, kana yawu zolaka kubwa, ti yandi zolaka kwenda na yawu.

¹³⁴ Mpe Yesu Klisto katukaka na Mazulu, na Nkembo; katuka na Nkembo, kulumukaka na yisi awa, samu na kutunga Dibuundu. Mpe kisadilu yina Yandi ke na kutulaka na kati ya Yawu, kele kisadilu yina me mekama na ntangu. Beni lendaka kwiza na autel mpe kusala funguna, kasi ntangu Yandi ke mona mabulu ya kukotisa mupepe mpe nyonso yankaka, beni me mona, yinza—yinza me tobula beni misyete, mpe nyonso yina, beni ke lenda ve kutelama. Yandi ke tula beni kaka na lweka mosi. Nzambi ke zolaka Dibuundu yina me mekama na ntangu; muntu ve yina kele Muklisto bubu yayi mpe ke vutuka manima mbasi, na kati mpe na ngaanda, mpe na zulu mpe na yisi. Yandi lenda tula beni kisika mosi ve.

¹³⁵ Kasi Yandi kele na Dibuundu yina me mekama, yina me luta na bakumekama, na bakuzimbisa, na nzila ya kimbevo, na nzila ya mpasi, na nzila ya lufwa, mpe dyaka kele ya kutelama na kimbangi. Yina kele muntu, yinga, ya kele muntu yina Yandi ke na kususaka. Mu ke kipe ve kana beni kele mputu. Mu ke kipe ve kana beni kele mulombi. Mu ke kipe ve kana beni kele muteki-

binuka. Nyonso yina beno kele, Nzambi ke tula kumekama na beno. Yandi ke na kusosaka kisadilu yina me mekama na ntangu. Mu ke kwikila, mosi ya bilumbu yayi ntangu Dibuundu yina ya nene. . .

¹³⁶ Ntangu, science ke tubaka, “Wapi mutindu ya lenda zimbana? Kubenda ke kanga beno na ntoto.”

¹³⁷ Ntangu yayi mu ke kukitala musambidi. Bika mu tuba na beno. Dibuundu yina me mekama na ntangu ke kota na luzingu kilumbu mosi. Ya lendaka vwanda na ndambu ya bawu ya kulala na fundu-fundu ya ntoto. Mu zaba ve kisika bawu kele, kasi Nzambi kele na bisadilu ya Yandi nyonso ya kumekama. Kilumbu mosi Yandi ke kwiza ke baka mantwala: “Beni landa Munu!” Kaka na nzila ya ba-atimosifere mpe ba-stratosphere, mpe ba-sphère mpe ba-sphere, na Mvwandulu ya Nzambi ya Ngolo nyonso Yandi ke kwenda, na Dibuundu yina me mekama na ntangu. Yina kele lubambuku na lemvo ya Yandi; yina kele lubambuku yina Nzambi ke pesa Yandi.

¹³⁸ “Muntu ve lenda kwiza na Munu kana ti Tata ya Munu me benda yandi ntete ve.” Mpe muntu nyonso yina ke kwizaka na Klisto kele dikabu ya zola ya Nzambi, mpe Klisto ke tulaka yandi na kumekama. Mpe kana yandi kanga ntima na kumekama, Yandi ke tula yandi na kati ya kyamvu, ke kanga yandi ngolo, ke pesa yandi kisika mosi, mpe ke tula yandi kuna, na kuzabaka ti yandi ke simba tii na nsuka ya nzila. Amen. Bisadilu yina me mekama na ntangu!

¹³⁹ “Na zulu ya Ditadi yayi,” ve na zulu ya ditadi mosi ya bufanatiki, ve na zulu ya nkonga ya émotion, ve na zulu ya nkonga ya théologie ya dibuundu, ve na zulu ya denomination mosi. Kasi, “Na zulu ya Ditadi yayi ya ngolo,” Ndinga ya Klisto, “Mu ke tunga Dibuundu ya Munu, mpe mielo ya difelo lenda nunga Yawu ata fyoti ve.” Ya ke vwanda kuna.

¹⁴⁰ Ya ke vwanda lubambuku ya lemvo ya Yandi, na ntwala ya Bawanzio. Ntangu Bawanzio yufulaka Yandi, kilumbu mosi, “Samu na yinki Nge ke kwenda na ntoto?” Yandi ke vutuka mpe ke lakisa Dibuundu yango ya kukondwa foti, ya kukondwa ditona, kukondwa mifutu. Yawu yina kisadilu. Yawu yina kima. Lukumu ya Yandi. Yandi fwana sala yawu. Mutungi-kyamvu yina zolaka tunga kyamvu; yandi zolaka tunga yawu, to kubebisa lukumu ya yandi. Klisto ke kuzwa Dibuundu, mpe Yandi fwana sala yawu. Samu ti, Yandi kwizaka na ntoto mpe kumaka nsuni, mpe zingaka na kati-kati ya beto; mpe kumaka disumu, samu ti beto lendaka kuma ya kusungama. Yandi kumaka beto, ti beto, na nzila ya lemvo ya Yandi, lendaka kuma Yandi. Yandi kwizaka na kubaka kisika ya beto, mutindu musumuki; samu beto kuzwa kisika ya Yandi, mutindu bana-babakala mpe bana-bakento ya Nzambi, na Mvwandulu ya Bunene ya Yandi. Yinki lemvo ya Nzambi!

¹⁴¹ Yinki mutindu beto lendaka tuba, “Bandinga yina kele mbote ve”? Mazulu na ntoto ke luta, kasi Bandinga yina ke luta ata fyoti ve.

¹⁴² Mwana-bakala mosi ya fyoti ya mpofo ya Indien, bampimpa tatu me luta, ya mpofo kubanda yandi vwandaka na bamvula basabala tatu—tatu to yiya, yandi kuzwaka kumona ya yandi, mbote-mbote, mpe yandi katukaka na estrade. Yinki ya vwandaka? Ya vwandaka lubambuku ya Ngolo mpe ya lemvo ya Yesu Klisto yina me mekama na ntangu. Nkumbu ya Yandi ya santu kusakumuka!

¹⁴³ Ntangu ya kumekama! Bakumekama, bampasi, bakuningana, mpe kubenda, ya kele kaka samu na kutala mipepe na kati ya beno, na kumona kana ya kele na mosi kuna. Ya kele Nzambi ke na kuningisaka beno mpe ke na kumekaka beno.

¹⁴⁴ Mwa ntangu fyoti me luta, Cesar Auguste ya nene, na manima ya bitumba mosi ya nene ya lukumu, mpe nungaka lunungu ya nene, yandi. . .ba zolaka pesa yandi mukembo na Rome. Mpe yandi tubaka na bawu, “Mu zola ti muntu mosi kutambula na kipusu, muntu mosi ya kulunga, kutambula na lweka ya munu na kipusu na ntangu mu ke sala yayi.” Yandi tubaka, “Mu zola ti muntu mosi kukabula balusakumunu yayi na munu.” Mpe nyonso. . . Ya lutaka na ba-camp nyonso. ba-officier nyonso bongisaka mansala ya bawu, mpe lengulaka bambele ya bawu, mpe salaka binwanunu ya bawu kulezima mbote, mpe nyonso, mpe vwandaka meka na kutelama mbote, mpe kupesa mbote na ntinu ya bawu, mpe nyonso yina.

¹⁴⁵ Mpe mosi na mosi kwizaka, kinwaninu ya bawu ya nene na ntwala ya yandi, mutindu yandi vwandaka kuna na kiti ya yandi ya kimfumu, vwandaka tala mbote. Mpe kuna me kwiza, officier mosi na ya yandi, mansala ya kulengula, kaka mansala ya kuzenga balweka nyonso, telamaka mpe pesaka mbote ya yandi. Cesar me ningisa yintu ya yandi; yandi me kwenda. Yankaka me kwiza, me pesa mbote ya yandi. Cesar me ningisa yintu ya yandi; mpe yandi me kwenda. Ntangu na manima ya ntangu, soda na manima ya soda.

¹⁴⁶ Na nsuka, na nsuka ya mulonga, me kwiza mwa solda fantassin mosi. Yandi vwandaka ve ata na kinwanunu ya kisengo samu na kulengula, to dyaka mansala ya kuzenga. Kasi yandi tambulaka na ntwala ya Cesar. Yandi zabaka mpe ve mutindu ya kusala mbote na mutindu ya mbote, kasi yandi kulumusaka kaka yintu ya yandi mpe kwendaka.

¹⁴⁷ Cesar tubaka, “Vingila fyoti. Nani nge kele? Vutuka awa.” Yandi belamaka kuna. Yandi talaka yandi. Yandi vwandaka na bamputa na kizizi ya yandi, mpe ya kuzenga, mpe kizizi ya kubeba, mpe kikata. Yandi tubaka, “Wapi kisika nge me kuzwa bidimbu yina?”

Yandi tubaka, “Kuna na bitumba, na kunwanaka samu na mfumu ya munu, Cesar.”

¹⁴⁸ Yandi tubaka, “Mata awa mpe vwanda na lweka ya munu. Nge kele yandi yina ba mekaka mpe me pesa kimbangi.”

¹⁴⁹ Mpangi, ya kele ve ntangu ya kubongisa mansala, ya kele ve bilumbu ya ndongosolo. Ya kele ntangu ya kumekama na ntangu. Ya kele ntangu yina Nzambi ke na kumekaka Dibuundu ya Yandi na kuzwa bidimbu ya bakumekama ya ngolo ya mvita, mpe ya bitumba, mpe ya bakunwana. Ya kele yandi yina ke tambula na lweka ya Yandi na kipusu.

¹⁵⁰ Oh mutindu ba mekaka mpe tezaka Élisée, ntete yandi lwata robe ya profete! Mutindu Élisée losaka robe yina na dipeka ya yandi! Mutindu yandi zolaka vwanda muntu ya mbote kudedema! Élisée wandaka tala yandi mbote kuna na bilanga, ntangu yandi wandaka bondula ntoto. Nzambi tubaka, “Yina kele muntu. Ya kele muntu yina lenda lwata lele yina. Yina kele muntu yina lenda lwata robe yina. Yandi lenda baka kisika ya nge.”

¹⁵¹ Nkumbu ya Mfumu kusakumuka! Mutindu disu ya Yandi ke monaka nyonso ke tambulaka na zulu ya ntoto, na kumekaka na kuzwa muntu mosi yina ke lwata robe yina Yandi tubilaka. “Beno lenda kunwa mbungu yina mu ke kunwa? Beno lenda kuzwa mbotika mutindu ya munu? Beno lenda,” Yandi tubaka na bawu.

¹⁵² Na yawu, beto, bubu yayi, mutindu Dibuundu, beno fwana lwata robe ya Klisto; muvimba ya kinkuti ya kisengo ya Klisto, muvimba ya kinwanunu ya kisengo mpe kinwanunu ya kisengo yina ke kebaka nzutu, mpe kinkuti ya kisengo, samu ti beto lendaka telama kukondwa dyambu na Kilumbu yina. Yandi ke na kutosaka balubambuku yina me mekama na ntangu, na yina Yandi lenda tuba, “Beno tala kisadi ya Munu. Mu mekaka yandi. Mu tezaka yandi. Mu me lutisa yandi na nzila, mutindu Job. Yandi ke pesa kaka kimbangi nkama na zulu ya nkama.” Nzambi tala beto kyadi, ti beto lenda baka Nzambi na Ndinga ya Yandi, mpe kuvwanda balubambuku yina me mekama na ntangu.

Beto sambila.

¹⁵³ Tata ya kusakumuka, beto ke tonda Nge, Nzambi ya Kulutila Santu, na kati ya bantima ya beto, samu na kutezama ya ntangu, na konso kumekama. Beto ke na kuwa mpasi ve samu na yawu, Mfumu, kasi beto ke vutula matondo ti lemvo ya Nge wandaka ya kulunga samu na kusadisa beto na nzila ya bantangu yayi ya nene ya kumekama.

¹⁵⁴ Mutindu muntu yina, na nkokila yayi, mutindu ya ke sepelisa bantu, ntangu yandi tubaka, *Lemvo ya Ngitungulu*, mpe ntangu beto kumaka na nzila yina!

Na kati ya bigonsa mingi, bampasi mpe
mitambu,
Yina mu me lutila;
Ya vwandaka lemvo yina nataka munu na
lukengolo tii awa,
Ya kele lemvo yina ke nata munu na ntwala.

¹⁵⁵ Oh, ya ke sepelisa ntima ya bantu! Beto ke kwikila ti ya vwandaka kuvwanda na mulonga na Nsangu na nkokila yayi, ti ya vwandaka ntangu ya kumekama, na kati ya bigonsa, bampasi mpe mitambu. Ya vwandaka samu na kusadisa Muklisto, yandi yina me fyongonina yandi mosi ntangu yayi mpe me zaba ti yandi kele ya kutelama ya kukwikama, na nzila ya lemvo ya Nzambi. Ya vwandaka na kunata nsoni na bayina kubwaka, mpe ke mataka mpe kulumukaka, mpe ke kipeke ve, mpe ke zingaka na muvusu. O Nzambi, ata kidimbu ya mputa ve samu na kutalisa bitumba. Beto ke sambila na nkokila yayi, Mfumu, ti Nge ke santisa Dibuundu, na nzila ya Menga ya Nge ya nene ya santu, mpe ke sukula nyonso yina kele ya yimbi, mpe bisika nyonso ya kulemba, mpe—mpe bansinga nyonso ya kubeba. Lutisa yawu dyaka na masini, mpe—mpe sala yawu dyaka, Mfumu, mpe—mpe sala yawu kisadilu. O Tata ya Kukonda nsuka mpe ya kusakumuka, kuwa kisambu ya kisadi ya Nge.

Mpe na yina beto me kulumusa bayintu ya beto.

¹⁵⁶ Kana ya vwandaka na muntu mosi ya mutindu yina awa na nkokila yayi, yina ke kuwa ti Nzambi, na bantangu yayi ya kumekama, ata mbala mosi ve me talaka beno ya kukwikama na kisika ya kisalu. Ntangu kuswana ke kwizaka, to beno ke dumukaka kaka na kati mpe ke kuzwa kisika na bawu? Ntangu kuswana ke telamaka, ntangu luswaswanu, ntangu baluswaswanu na dibuundu ke kwizaka, beno ke bakaka balweka na binzambi-nzambi mpe bimvuka, mpe nyonso ya mutindu yina? Beno ke kuwaka kutonga na babala-bala mpe bisika yankaka? Kana beno me zaba dyambu yina, beno me natama na kati ya mupepe ya dyabulu, beto vutuka na dibulu ya tiya, na nkokila yayi, mpe beto nienama dyaka, mpe kubasika kukondwa yawu na beto. Ti Nzambi kutunga beto mpe kukubika beto samu Kyamvu yayi ya nene kubakama na Enlevement ya Yawu. Kana muntu mutindu yina kele awa, mpe ke zola ti ba bambuka yandi moyo!

¹⁵⁷ Beno ke tuba, “Mpangi Branham, wapi mutindu mu lenda zaba ti lubambuku yayi ya Seko yina ke kufwaka ve, ke telama?”

¹⁵⁸ Mu ke tangila beno Ndinga ya Yandi, landila Jean 5:24. “Yandi yina ke kuwa Ndinga ya Munu.” (Ve “Ke kwendaka na lukolo ya Munu.”) “Yandi yina ke kuwa Bandinga ya Munu, mpe ke kwikila na Yandi yina fidisaka Munu, kele na Luzingu ya Kukonda nsuka, mpe ke kwiza ata mbala mosi ve na lufundusu; kasi me luta lufwa na Luzingu.”

¹⁵⁹ Beno lenda kuwa Ndinga ya Yandi kubokila beno, na nkokila yayi? Kana beno lenda, mpe zola ti ba bambuka beno moyo na kisambu, beno zola kutelemisa diboko ya beno. Beno tuba, “Mpangi Branham, sambila kaka samu na munu. Mu zola kuvwanda mutindu ya kisadilu ya mbote, ti ntangu Klisto ke basisa Dibuundu ya Yandi, ti mu ke vwanda ve...” Nzambi sakumuna nge, tata. “Ti mu ke vwanda ve ya kuningana na yina me tala yawu, Yandi ke tula munu kaka na kati ya Dibuundu.” Nzambi sakumuna nge, ntwenya ya bakala. Nzambi sakumuna nge, mpangi ya kento. “Mu zola kuvwanda...” Nzambi sakumuna nge, mpangi ya bakala. “Mu zola vwanda mutindu ya mbote ya kisadilu.” Nzambi sakumuna nge, mwana ya fyoti na manima kuna. Nzambi sakumuna nge awa, mpangi ya munu ya bakala ya luzolo. “Mu zola ba kuta munu mutindu kisadilu ya kieleka. Mu zola kuvwanda na lenda ya kupesa kimbangi ya yina kivuvu yina kele na kati ya munu; kivuvu!” Nzambi sakumuna nge, mpangi ya kento. Ya kele mbote. Ya kele kieleka.

“Yinki ya ke sala, Mpangi Branham, na kutelemisaka maboko ya munu?”

¹⁶⁰ Beno ke luta lufwa na Luzingu. Ya kele yina beno ke salaka. Beno ke buka konso musiku ya ngolo ya kubenda, kaka kuna. Beno me mona, kana beno vwandaka kaka kimonikisi ya kuvwanda kuna, beno zolaka ata fyoti ve kutelemisa diboko ya beno. Beno zolaka sala yawu ve. Kasi ya ke lakisa ti ya kele na mpeve na kati ya beno, mpeve, mpe mpeve yango me kuwa Mpeve ya Nzambi kuzonza na beno. Mpe mpeve yango yina kele na kati ya beno me baka lukanu, na yawu ya ke telemisa science. Ya ke telemisa ngolo ya kubenda. Ya ke telama, na kulakisaka ti ya kele na mpeve na kati ya beno, yina lenda telemisa diboko ya beno. Kana beno vwandaka ya kufwa, beno zolaka sala yawu ve, kasi beno me kuma na Luzingu. Kima mosi me salama.

¹⁶¹ Kana beno kele ya kufwa na disumu mpe kukolama, Nzambi lenda dyaka ve kuzonza na beno, diboko ya beno ke vwanda na yisi. Kana beno kele ve ya kufwa na disumu mpe nzimbani, mpe Nzambi lenda zonza na beno, mpe beno ke kuzwa Luzingu, beno ke telemisa diboko ya beno. Beno me mona, ya ke lakisa ti Luzingu me baka lukanu, beno me ndima Klisto. “Beno me luta lufwa na Luzingu,” kana ya zola kutuba mutindu yina samu na beno.

¹⁶² Yawu fwana zola kutuba mutindu yina samu na beno ntangu yayi, na yina beno ke telemisa diboko ya beno. Beno tuba, “Nzambi, tala munu kyadi, sala munu yina mu fwana vwanda. Mpe mu ke sadila Nge luzingu ya munu nyonso. Mu zola ba kuta munu ya kukubama na kilumbu yina.” Lusakumunu na zulu ya nge, mpangi ya munu ya bakala ya luzolo na manima kuna. Nzambi sakumuna nge, ntwenya ya bakala. Nzambi sakumuna nge, kuna mpa-... Nzambi kuvwanda na

nge. Nzambi sakumuna nge, cherie. Mbote mingi, muntu yankaka. Nzambi sakumuna nge awa, Mpangi Roy, mpe Mfumu kuvwanda na nge. Yinga. “Mfumu, tala munu ya kulunga. Tala munu ya kulunga.” Nzambi sakumuna nge, mpangi ya munu ya bakala kuna na manima. Ya kieleka, Nzambi ke mona nge. Beno vwanda na kyese. Muntu yankaka zola ti ba bambuka yandi moyo na kisambu kaka na ntangu yayi? “Kumisa munu...” Mbote mingi. Beto... 

57-0818 Balubambuku Ya Nzambi Yina Me Mekama Na Ntangu
Branham Tabernacle
Jeffersonville, Indiana U.S.A.

KIKONGO-KITUBA

©2025 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org